

Lutofæ in Hannonia abbas, circa annum, ut apparet, CM vitâ functus. Badiloni accedunt Hugo, Hierosolymitanus seculo XIII eques, & Compagnus, Camaldulensis seculo eodem monachus. De priori Synopsin historicam, è Bosii sermone italico latinè redditam, commentario prævio subjecimus; de posteriori verò confecimus Syllogen, quâ Beati gesta corporisque incorrupti translationes, sumus complexi. Die IX ab Ægypto suppeditatur Andronicus, eremiticæ post conjugium vitæ professione clarus. Eodem die recensemus Savini seu Sabini monachi vitam, commentario prævio illustratam. Gisleno conf. archiepiscopatum Atheniensem abjudicamus, aliiq; quæ ad eum pertinent, sedulò discussis, commentario prævio, quo id præstamus, vitam, ab authore anonymo conscriptam, subnectimus, addita etiam alterius authoris anonymi lucubratione, quâ, in lucem nondum emissa, Gisleni reliquiarum inventio miraculaque exponuntur. De Lamberto & Bellerio, Gisleni discipulis, pauca dumtaxat habemus comperta, suntque partim fabulosa, quæ de Gemino, forsan monacho, perhibent ejus acta. Deusdedit, Casinensis sec. IX abbas, solemnî ritu Sanctis, utut prodigiis clarus, haud fuit adscriptus. Petri Galatæ monachi gesta è solis magnis Græcorum menæis innotescunt. Guntheri, Benedictini seculo XI monachi, acta ab authoribus, ut apparet, partim Wolfherro æquali, partim anonymo minùs antiquo sunt conscripta. Hæc, miraculis etiam, quæ Beatus patravit, ad calcem adjectis, è Mabilonio edidit. Tomo coronidem imponunt Goswinus, Aquicinctinus propè Duacum sec. XII abbas, & Joannes Lobedavius Ordinis S. Francisci, Culmiæ in Prussia cultus.

*Ex statu seculari.*

Die VIII initium tomus ducit à Simeone propheta. Anne hic, qui Christum, dum Hierosolymis offerretur in templo, in ulnas suscepit, sacerdos exstiterit, examinamus in Sylloge.